

DISCIPLINSKI PRAVILNIK CRNOGORSKOG JEDRILIČARSKOG SAVEZA

I. OPŠTE ODREDBE

Član 1.

Svi članovi (klubovi) i njihovi članovi iz Člana 7. Statuta (u daljem tekstu članovi), tijela upravljanja, stalna stručna tijela, njihovi članovi i sve osobe koje obavljaju neku dužnost u CJS-u podliježu disciplinskoj odgovornosti zbog povrede statuta i pravilnika CJS.

Član 2.

Niko ne može biti smatran počiniocem prekršaja prije nego što se to ustanovi pravosnažnom odlukom mjerodavnog tijela .

Član 3.

Članovi čine prekršaj ako je učinjen postupcima ili propustima tijela, odgovorne osobe ili osobe koja je bila ovlaštena istupiti u ime tog člana.

Član 4.

Odgovornost člana postoji ako je prekršaj počinjen njenim postupcima ili propustima. Odgovornost člana ne prestaje prestankom članstva ili dužnosti u tijelu ili organizaciji.

Član 5.

Nepoznavanje opštih propisa i disciplinskog pravilnika ne isključuje odgovornost počinitelja prekršaja.

II. DISCIPLINSKI PREKRŠAJI

Član 6.

Počinitelj je odgovoran kad prekršaj učini s promišljajem ili iz nehata. Počinitelj prekršaja koji iz opravdanih razloga nije znao da je taj prekršaj zabranjen može se blaže kazniti ili osloboditi kazne. Ne smatra se prekršajem, u smislu ovog disciplinskog pravilnika, ako je prekršaj učinjen u nužnoj odbrani, krajnjoj nuždi ili stvarnoj zabludi.

Član 7.

Za prekršaj odgovara počinitelj prekršaja, kao i onaj koji ga je poticao ili mu pomogao pri prekršaju.

Član 8.

Prekršaj se kažnjava samo ako je to predviđeno ovim Disciplinskim pravilnikom.

Član 9.

Kod odmjeravanja kazne moraju se uzeti u obzir sve olakšavajuće i otežavajuće okolnosti.

Kao olakšavajuće okolnosti smatrat će se:

- a) priznanje i osjećaj krivice;
- b) ranije nekažnjavanje;
- c) vladanje;
- d) godište.

Kao otežavajuće okolnosti smatrat će se:

- a) ranije kažnjavanje;
- b) organizirano učinjen prekršaj od više lica;
- c) prekršaj na regatama u inostranstvu;
- d) prekršaj iz niskih pobuda.

Član 10.

Disciplinski postupak se ne može pokrenuti protiv izvršitelja prekršaja, ako prijava nije podnijeta u roku od 30 dana po izvršenju prekršaja. Izuzetno će se pokrenuti postupak iako je prijava podnijeta poslije roka od 30 dana, ako je podnositelj prijave za prekršaj doznao kasnije, a ne duže od 6 mjeseci.

Član 11.

Vrste prekršaja su:

1. Nekorektno i nedostojno ponašanje člana prema ostalim članovima, ljudima koji rade u Savezu ili ostalima;
2. Zanemarivanje povjerene dužnosti u CJS-u;
3. Nesportsko ponašanje na regatama, kao psovanje, prigovaranje odlukama sudaca, drski odnos prema rukovodiocima takmičenja, vrijeđanje ostalih takmičara, gledalaca i fizički napad na iste i sl.;
4. Neopravdani izostanaci takmičara i članova na prijavljenim regatama;
5. Učestvovanje na regatama i obavljanje funkcije za vrijeme suspenzije i kazne zabrane nastupa;
6. Neopravdano izostajanje na pripremama reprezentacije Crne Gore kao i nesudjelovanje u reprezentaciji, ili ne blagovremeno obavještanje o nemogućnosti učestvovanja u reprezentaciji;
7. Davanje lažnih podataka o identitetu i pravu nastupa prilikom podnošenja prijave za verifikaciju ili nastup;
8. Ne odgovaranje obavezama i zahtjevima viših rukovodstava za dostavljanje izvještaja, informacija i drugih podataka u određenim rokovima;
9. Dezorganizacija i neredi na regatama i ostalim akcijama;
10. Povredu Statuta, Pravilnika i drugih propisa CJS;
11. Davanje netačnih podataka i lažno svjedočenje;
12. Namjerno kršenje propisa iz Regatnih pravila, Pravila klase, Pravilnika, Uputa za jedrenje itd.;
13. Nastupanje na regatama a bez saglasnosti i znanja CJS i članova;
14. Krađe;
15. Oštećenje ili uništavanje imovine;

III. VRSTE KAZNI

Član 12.

Za učinjene prekršaje iz člana 14. ovog pravilnika počinitelju se mogu izreći slijedeće kazne:

1. opomena
2. zabrana nastupa na regatama
3. zabrana obavljanja dužnosti
4. doživotno isključenje iz CJS-a

Kazne navedene u 2. i 3. mogu biti i s odlaganjem u trajanju od 24 mjeseca.

Član 13.

Opomena se izriče za prekršaje učinjene pod naročito lakim okolnostima za koje je inače predviđena kazna zabrane nastupa ili obavljanja dužnosti, ako Disciplinska komisija presudi da će se i takvom kaznom postići svrha kažnjavanja.

Član 14.

Kazna "zabrana nastupa na takmičenjima - regatama" ili "zabrana obavljanja dužnosti" može biti izrečena članu ili pojedincu, te se može odnositi na takmičenje u zemlji ili inostranstvu.

Član 15.

Kazna zabrane nastupa pojedinaca na regatama ne može biti manja od 1 mjeseca, niti veća od 24 mjeseca.

Član 16.

Kazna doživotnog isključenja iz CJS izriče se za prekršaje učinjene pod izuzetno teškim okolnostima, kad je počinitelj pri njegovom izvršenju pokazao naročitu odlučnost, upornost i bezobzirnost ili je izazvao posebno teške posledice.

Član 17.

Pri izricanju kazne, disciplinska komisija može odgoditi izvršenje izrečene kazne (uslovna kazna) na vrijeme koje ne može biti kraće od 6 mjeseci niti duže od 2 godine, s tim da se izrečena kazna neće izvršiti ako počinitelj u tom roku ne izvrši novi prekršaj. Odstupanje izrečene kazne određuje se ako prema okolnostima pod kojima je prekršaj učinjen i prema ponašanju počinitelja nakon njegova izvršenja, kao s obzirom na njegov raniji život, disciplinska komisija presudi da počinitelj i bez izvršavanja izrečene kazne u buduće neće činiti prekršaje, kao i da će samo izricanje kazne sa odlaganjem postići svrhu kažnjavanja.

IV. ODMJERAVANJE KAZNE

Član 18.

Pri odmjeravanju kazne uzimaju se u obzir sve okolnosti koje utiču da kazna bude veća ili manja a na posve težina učinjenog prekršaja i njegove posledice, stepen odgovornosti počinitelja, pobude i okolnosti pod kojima je prekršaj učinjen te moralne osobine i držanje počinitelja nakon učinjenog prekršaja.

Član 19.

Otežavajuće okolnosti postoje kada je prekršaj učinjen u povratu, kad postoje posebno teške posljedice ili ostale okolnosti zbog kojih je prekršaj dobio teži oblik. Počinitelj je u povratu ako je ranije bio kažnjavan a nije proteklo više od godinu dana računajući od dana izdržavane kazne u sportu uopšte.

Član 20.

Olakšavajuće okolnosti postoje kada je počinitelj prije učinjenog prekršaja bio primjernog sportskog ponašanja i morala, ili na to ukazuje njegov staž, ugled ili učestvovanje u reprezentaciji ili ostale zasluge i priznanja za razvitak jedriličarskog sporta. Priznanje počinitelja prekršaja uvijek je olakšavajuća okolnost.

Član 21.

Ako se odmjerava kazna za više prekršaja o kojima se istovremeno odlučuje, najprije se ustanovljuje kazna za svaki prekršaj posebno, a zatim se odlučuje o jedinstvenoj kazni, i to na ovaj način:

- ako je za jedan prekršaj ustanovljena kazna doživotnog isključenja izriče se samo ta kazna;
- više izrečenih kazni vremenske kazne nastupa ili obavljanja dužnosti ili kazne zabrane nastupa ili obavljanja dužnosti na određenom broju regata, spaja se u jednu kaznu koja mora biti niža od zbira izrečenih kazni a viša od polovine zbira izrečenih kazni;
- ako je za jedan prekršaj izrečena kazna zabrane nastupa ili obavljanja dužnosti, a za drugi zabrana nastupa ili obavljanja dužnosti na određenom broju regata, tada se izriče jedinstvena vremenska kazna zabrane nastupa ili obavljanja dužnosti.

Član 22.

Pravosnažne odluke o kaznama se unose u zapisnik kazni koji vodi kancelarija CJS.

Član 23.

Istekom jedne godine od dana izdržane kazne kažnjениk se briše iz zapisnika kazni. Kazna sa odgodom se briše iz zapisnika kazni prolaskom 3 mjeseca, računajući od dana prolaska vremena za koje je izvršenje bilo odgođeno.

V. DISCIPLINSKI POSTUPAK I DJELOKRUG ODLUČIVANJA

Član 24.

Disciplinski postupak se pokreće na osnovu prijave. Prijava se podnosi pismeno disciplinskoj komisiji, putem kancelarije CJS-a. Prijava mora sadržati ime ili članice ili tijela protiv koje se prijava podnosi, tačnu adresu i imena saučesnika u prijavi i osoba protiv kojih se podnosi prijava kao i svjedoka. Anonimne prijave se ne uzimaju u razmatranje.

Član 25.

Na osnovu člana 28. Statuta CJS, Disciplinsku komisiju CJS čine predsjednik i 4 člana kojeg bira i razrješava Skupština. U prvom stepenu odluke samostalno donosi Disciplinska komisija. U drugom stepenu odlučuje izvršni odbor CJS, a odluku o sprovođenju postupka za zaštitu

zakonitosti pokreće Skupština CJS-a. Disciplinskoj komisiji u radu pomažu stručni saradnici kojima se u postupku mogu povjeriti pojedine radnje za donošenje ispravne odluke.

Član 26.

Disciplinska komisija će zatražiti dostavu pismene izjave od prijavljenog člana odnosno prijavljenih osoba i svjedoka putem kancelarije CJS-a što će se smatrati saslušanjem.

Član 27.

U koliko se prijavljeni član ili osoba ne odazove pozivu koji je uredno dostavljen ili je odbio primiti poziv, odnosno u koliko prijavljenik ili svjedok nije dao pismenu izjavu u roku koji je određen smatraće se da je poziv uručen, odnosno da je prijavljenik ili svjedok saslušan i postupiće se u skladu sa članom 31.

Član 28.

Sprovodi se rasprava odnosno konsultacije članova Disciplinske komisije. Tok rasprave odnosno konsultacije članova disciplinske komisije su tajna koji se isti moraju pridržavati. Nakon zaključivanja rasprave članovi Disciplinske komisije se izjašnjavaju o krivici, te o vrsti, odnosno o roku trajanja određene kazne.

Pravosnažne odluke donose se ako je prisutan nadpolovičan broj članova Disciplinske komisije, a odluke se donose nadpolovičnom većinom glasova prisutnih. U slučaju izjednačenosti glasova vrijedi odluka za koju je glasao Predsjednik. U slučaju spriječenosti predsjednik Disciplinske komisije je dužan pismeno ovlastiti jednog od članova Disciplinske komisije koji ga zamjenjuje pri vođenju rasprava ili konsultacija.

Član 29.

U koliko tokom postupka Disciplinska komisija utvrdi da ne postoji disciplinski prekršaj, postupak se obustavlja. U koliko se tokom postupka utvrdi da je prijava zlonamjerna ili lažna, Disciplinska komisija će pokrenuti postupak protiv podnosioca prijave.

Član 30.

Disciplinska komisija može nakon završenog postupka donijeti sledeće odluke:

- odbaciti prijavu i osloboditi odgovornosti osobu kojoj se stavlja na teret određeni prekršaj;
- izreći jednu od kazni predviđenih članom 15.;
- odložiti donošenje odluke radi pribavljanja drugih dokaza.

Član 31.

Disciplinska komisija mora izraditi pisani dokument odluke o odgovornosti okrivljenika. Dokument posebno sadrži:

- naziv i stav Disciplinske komisije kao i naziv odluke;
- ime, prezime i dužnost osoba, odnosno naziv tijela kome se kazna izriče;
- opis prekršaja;
- odluku o kazni;
- obrazloženje odluke;
- pouka o pravnom lijeku.

Član 32.

Dokument odluke se piše i dostavlja okrivljeniku, članu (klubu) čiji je okrivljenik član, kancelariji CJS-a i podnosiocu prijave.

Član 33.

Protiv odluke Disciplinske komisije donijete u prvom stepenu može se podnijeti žalba u roku od 7 dana računajući od dana prijema dokumenta odluke, a podnosi se Izvršnom odboru CJS-a. Žaliti se može podnosioc prijave, okrivljenik lično ili podsredstvom svoga branitelja ili ovlašćenog lica, te član u ime svoga člana. Žalba zadržava izvršenje odluke.

Član 34.

Izvršni odbor CJS-a kao drugostepeno tijelo žalbu može:

- odbaciti;
- odbiti, a odluku disciplinske komisije potvrditi;
- usvojiti, a predmet vratiti Disciplinskoj komisiji na ponovno razmatranje i odlučivanje;
- odluku preinačiti.

Izvršni će odbor CJS-a odbaciti žalbu zbog njene nepravodobnosti i nedopuštenosti.

Član 35.

Ako je izrečena kazna doživotnog isključenja ili kazna zabrane nastupa ili obavljanja dužnosti u trajanju dužem od 1 godine, a takva odluka bude potvrđena u 2 stepenu, protiv tih se odluka može izjaviti zahtijev za pokretanje postupka za zaštitu zakonitosti Skupštini CJS-a u roku od 15 dana od primanja odluke u 2 stepenu. Zahtijev za zaštitu zakonitosti može se odbiti ili usvojiti. Ako se usvoji pravosnažna se odluka ukida, a predmet vraća na ponovno razmatranje i odlučivanje.

Član 36.

Ako je žalbu podnio samo okrivljenik lično ili posredstvom svoga branitelja ili ovlašćenog lica, odluka se u 1 stepenu ne može izmijeniti na njegovu štetu.

VI. VANREDNI PRAVNI LIJEKOVI

Član 37.

Ponavljanje postupka se može tražiti:

- ako postoji sumnja da je odluka zasnovana na lažnim dokazima;
- ako postoje činjenice i novi dokazi koji ranije nisu bili poznati, a koji su uticali na odluku.

Član 38.

Predlog o ponavljanju postupka mogu podnijeti:

- kažnjenik;
- član (klub) ako je kažnjenik njegov član;
- podnosilac prijave.

Predlog o ponavljanju postupka, kada je riječ o novim činjenicama i novim dokazima, podnosi se najkasnije u roku od 1 mjeseca od dana saznanja za te činjenice odnosno dokaze. Predlog o ponavljanju postupka mora se svakako podnijeti u roku od 3 mjeseca od dana pravosnažnosti odluke. O prijedlogu za ponavljanje postupka odlučuje tijelo čija se odluka odbija.

Član 39.

Na osnovu molbe kažnjenika Izvršni odbor ili Skupština CJS-a može kaznjenika osloboditi od daljeg izdržavanja kazne ili kaznu ublažiti ako postoje okolnosti koje opravdavaju takvu odluku. Pri odlučivanju u smislu predhodnog stava uvijek će se tražiti mišljenje tijela koje je izreklo kaznu. Molba za vanredno ublažavanje kazne može se podnijeti nakon prolaska polovine vremena od izrečene kazne odnosno njene pravosnažnosti.

VII. IZVRŠENJE KAZNE

Član 40.

Izvršenje kazni po članu 15. vrši se uručenjem rješenja. U koliko se odbije primiti odluku o izrečenoj kazni dostava se vrši na način da se odluka objavi putem oglasne table u klubu (članu). Kada je disciplinska kazna izrečena članu (klubu), članovima njihovih organa ili rukovodiocima CJS-a odluka se obavezno objavljuje na oglasnoj tabli člana (kluba) odnosno pismenim obavještenjem svim članovima CJS-a.

VIII. ZAVRŠNE ODREDBE

Član 41.

Osoba koja je odlukom o kazni zabrane nastupa na regatama odnosno zabrana obavljanja dužnosti ne smije prihvatiti članstvo drugog člana (kluba) prije prolaska roka isteka kazne.

Član 42.

Pobliže tumačenje ovog Pravilnika daje Izvršni odbor CJS-a.

Član 43.

Izmjene i dopune ovog Pravilnika donosi Skupština CJS-a.

Član 44.

U koliko koja odredba ovog Pravilnika bude u suprotnosti sa Statutom CJS-a ili sa pozitivnim propisima, istog časa prestaje važiti odredba Pravilnika, a primjenjivaće se odrednica Statuta pozitivnog propisa.

Član 45.

Ovaj Pravilnik mogu primjenjivati članovi (klubovi), u koliko ga prihvate na Skupštini, uz predhodno imenovanje organa za vođenje disciplinskih prekršaja.

Član 46.

Ovaj Pravilnik je usvojen na Skupštini CJS-a 09. septembra 2009. godine.

Baošići, 09.09.2009.

Predsjednik Skupštine
Robert Farkaš s.r.